

ცარიელი ადგილები ტრიბუნებზე

თბილისი. “დინამოს” სტადიონი. 28 ივლისი.

“დინამო” (თბილისი) – “კაირატი” (ალმა-ათა) 0:0.

“დინამო”: ურუშაძე, პეტრიაშვილი, ჭელიძე, რეხვიაშვილი, ცხოვრებოვი, ხართიშვილი, ილიაძე, დათუნაშვილი, მაისურაძე (ხუციშვილი), იამანიძე, მესხი.

“კაირატი”: ლისიციანი, მუსინი (ნეჩისტკივი), იშჩენკო, ფედოტოვი, ფალინი, სეგიზბაევი, ოსტრიუშკო, ვორონჩიხინი, როჟკოვი, ვოლოხი

მსაჯი პ. კაზაკოვი (მოსკოვი).

ცარიელი ადგილები თბილისის “დინამოს” სტადიონზე, როცა ჩვენს გუნდს საკავშირო ჩემპიონატის კალენდარული მატჩი აქვს? ვინ გაიხსენებს გულშემატკივრებიდან, როდის მოხდა ეს ამბავი უკანასკნელად?

28 ივლისს, “კაირატთან” მატჩში. მსაჯმა თამაშის დაწყების სასტვენის მისცა და სტადიონზე ჯერ კიდევ შემოდოდნენ დაგვიანებულნი, რომლებმაც, ალბათ, ბოლო მომენტში გადაწყვიტეს მაინც მოსულიყვნენ თამაშზე და უშუალოდ დასწრებოდნენ დინამოელთა მატჩს. მიუხედავად ამისა, ტრიბუნებზე საკმარისზე მეტად იყო ცარიელი ადგილები, რომლებიც ნათლად გამოხატავდნენ ფეხბურთის მოყვარულთა პროტესტს თბილისის “დინამოს” ბოლო ხანების წარუმატებლობისა და ცუდი თამაშისადმი.

მაგრამ ცუდი თამაში ხომ თავისით არ მოდის? მას აქვს ლოგიკური მიზეზები. რაში მდგომარეობს ის?

თავი დავანებოთ იმას, რომ ჩვენს გუნდს ახლა აკლია წამყვანი მოთამაშეები და ძირითად შემადგენლობაში ამჟამად მოთამაშე ახალგაზრდა ფეხბურთელები ვერ აჩვენებენ მომზადების სტაბილურ დონეს. ვილაპარაკოთ იმათზე, ვინც დღეს გამოდის მინდორზე.

მაყურებელი აშკარად შეამჩნევდა იმ დიდ განსხვავებას, რომელიც იგრძნობოდა “კაირატთან” ჩატარებული მატჩის პირველ და მეორე ტაიმებს შორის. თბილისელთა მიერ შესრულებული პირველი ტაიმი ყოველგვარ კრიტიკაზე დაბლა დგას. არავითარი ტემპი, არავითარი მონდომება საიმისოდ, რომ ხელთ ეგდოთ ინიციატივა და ეგრძნობებინათ მოწინააღმდეგისთვის თავისი ძალა. დინამოელთა თამაში უფრო ორმხრივ საწვრთნელ მეცადინეობას ჰგავდა, ვიდრე კალენდარულ მატჩს იმ მოწინააღმდეგესთან, რომელსაც ბოლო ხანებში საკმაოდ სერიოზული წარმატებები აქვს მოპოვებული. ყველაფერი მიმდინარეობდა ისე, როგორც ეს “კაირატს” უნდოდა: თბილისელები სისტემატურად კარგავდნენ ბურთს, არ გამოდიოდნენ გადაცემაზე, ბურთის თვითეული მიღებისა და დამუშავებისას იკარგებოდა აუარებელი დრო (ამასობაში ალმათელები დაცვის საქმეებს აწესრიგებდნენ), ხოლო ის დაბალი ტემპი, რომელიც მასპინძლებმა აირჩიეს, ფაქტიურად სტუმართა გემის ერთ-ერთ ძირითად ნაწილს წარმოადგენდა. მატჩი ისე დამთავრდა, რომ ჩვენ ვერ გავიგეთ თუ რატომ ითამაშა ჭელიძემ განაპირა მცველის პოსტზე, ხოლო პეტრიაშვილმა – სტოპერად. “კაირატის” თავდასხმაში არ ჩანდა რამე საიმისოდ, რომ ასეთი გადაადგილების საჭიროება ყოფილიყო და გარდა ამისა, ცნობილია, რომ ჭელიძეს არა აქვს ის სისწრაფე, რომელიც განაპირა მცველს სჭირდება. თავდასხმაში სრული უმოქმედობა გამოამყლავნეს დათუნაშვილმა და მაისურაძემ, ნახევარმცველები კარგავდნენ გადაცემათა უმეტესობას, ძალზე სუსტად იბრძოდნენ მაღალი ბურთებისთვის და კიდევ უფრო ანელებდნენ ისედაც დაბალ ტემპს. რაც შეეხება დაცვას, გასაკვირია, რომ აქ დაშვებული შეცდომების შედეგად (განსაკუთრებით – რეხვიაშვილისა და ჭელიძის მხრივ) ანგარიშის გახსნა ვერ შეძლეს ვორონჩიხინმა, სეგიზბაევმა ან ფალინმა.

შედარებით უკეთესი იყო დინამოელთა მეორე ტაიმი. 45 წუთის განმავლობაში ბურთი თითქმის არ მოსცილებია “კაირატის” კარს. მესხი ზედიზედ არღვევდა მოწინააღმდეგის დაცვას, ამოქმედდნენ სხვა თავდამსხმელებიც, მაგრამ, ეტყობა, 45 წუთი ჩვენი გუნდისთვის არაა საკმარისი საიმისოდ, რომ მოუგოს “კაირატს”. მაქსიმალური სიძლიერით თამაში საჭიროა მთელი მატჩის განმავლობაში, მთელი 90 წუთი, წინააღმდეგ შემთხვევაში წარმატებას ვერ მიაღწევ. თბილისის “დინამომ” ეს ჭეშმარიტება რამდენიმეჯერ მწარედ გამოსცადა საკუთარ თავზე, მაგრამ დღემდე ვერ გამოიტანა შესაფერისი დასკვნა. კაირატელებმა გაუძლეს დინამოელთა შტურმს მეორე ტაიმში, მაგრამ თამაში რომ ასე წარმართულიყო თავიდანვე, თბილისელები აუცილებლად მოიპოვებდნენ საჭირო გამარჯვებას.

მატჩი “კაირატთან” თბილისის “დინამომ” ჩაატარა სუსტად და თავის ისედაც მოკრძალებულ ბალანსს შესძინა მხოლოდ 1 ქულა. ეს კი ძალზე ცოტაა როგორც ჩვენი გუნდის პრესტიჟისთვის, ისე მისი სატურნირო მდგომარეობისთვისაც.

ახლა მთელი იმედები დამყარებულია იმ წამყვან მოთამაშეებზე, რომლებიც სულ მალე უნდა დაბრუნდნენ მსოფლიო ჩემპიონატიდან. მათ ყველაფერი უნდა გააკეთონ საიმისოდ, რომ გამოასწორონ თბილისის “დინამოს” ჩავარდნა.

ვ. შავდია.

**საკავშირო კატეგორიის მსაჯი, საქართველოს დამსახურებული მწვრთნელი.
“ლელო”, 30.07.66**